

随園全集

文集



小倉山房續文集卷三十二

錢唐袁枚子才

海州知州何君墓志銘

乾隆庚戌八月老友何君獻葵臨終以蒞官事狀蠅頭書付其家人云爲我交隨園當必有以報我其時君長子承燕作天台校官次子承薰需次秦中三子承福尙幼餘皆婦女治喪倥匆遺失其狀今年將卜葬矣承燕來乞志墓知秉筆者不能鑿空爲文而又不忍沒其先人誣諉之志涕泣而謀諸余余道古人碑銘事迹與交情並書余交而翁四十年爲子者不忍死其親余亦不忍死其友也豈可以事狀不具而聽其沒沒哉謹就所知聞爲之銘曰君諱廷模字獻葵號西舫杭州丁卯舉人分發江蘇知如臯縣調沛縣遷牧高郵再遷海州俸滿引見丁母憂歸服闋不起終於如臯君清癯蘊立皙而髯目睒睒有光聰強詳審頗饒幹畧常愛余所撰州縣心書手抄以去蒞官時試而行之所到豪暴屏迹胥役肅然如臯素稱難治君初臨投牒者如麻一二年後訟庭如水以其暇修冒辟疆故址建水明樓與紳士詠歌其間在高郵重到如臯修城鄉邑父老扶杖攜幼而迎者遮馬首不前君愛其風俗之醇遂卜宅焉嗟乎古之賢人往往樂居舊治孔僖之於臨晉盧愬之於靈昌莫不皆然其故何哉蓋當其作官時視官如家視其民如隸子弟及其去也民之奉其官亦如父如主人居他鄉轉勝故鄉也奈今士大夫作官如作賈虐取諸民在官時莫敢誰何一旦解印歸瓦礫爭投者如雲而起尙敢緩須臾出境哉君能安居如臯是即循良之明效勝行狀一篇矣先是余宰沭陽有吳某就館洪氏妻昏夜被殺主名不立洪氏子與其奴互相誣余屢訊不決遂

成疑獄偶與君言及君曰此獄固難辦然君亦未盡心余問何也曰君何不將二囚合繫之陰使人察其所言再分繫之使人爲鬼嘯以怵之或真情可得余憬然若失悔計不出此因服君之才之過余也君行義敦篤性殊瀟灑在江甯小住輒來山中佐余疏流泉蒔花竹登天風閣看江相約結隣蕭然有出世之想厥後急流勇退樂志林泉者十餘年在當時亦預覘梗槩云先娶某氏再娶某氏女二人孫五人葬某

銘曰勿放勿拘持身瞿瞿未老而賦閒居卜一廛於所治之區蓋事事學余也然長余一歲而竟泉路之先驅得毋愛余文而有意歸真將身後之名見託歟吁

誥授資政大夫兵部右侍郎抑堂史公墓志銘

公姓史諱奕昂字吉甫號抑堂漢灤陽壯侯之裔世居夏莊祖夔康熙壬戌翰林官至宮詹父貽直歷任三朝官文淵閣大學士兼吏部尙書謚文靖有子三人公其次也雍正四年

世宗欽賜諸大臣子弟舉人文靖公愛公聰敏意屬公公讓於長兄奕簪而已亦旋中順天鄉試乙科以恩廕授刑部山西司員外郎出爲山東兗沂曹道調運河道公長不踰中人而風骨秀整有守有爲乾隆十六年黃河決豫州自陽武建瓴而下穿張秋之挂劍臺勢洶洶不止議者或欲塞臺口或欲拍麥田下流公皆不可請於河帥顧公曰上源不斷而徒治下流無益也爲今計宜聯東兩省爲一局先塞陽武咽喉乃從事於東棄故河開新河築兩堤如翼遏水北行則河力自退如其策水患果除會有旨命協辦南河石料濟甯乏船公借停運糧艘運石以往爲漕帥所劾亡何南河奏他省協濟之石未到而東省協濟之石全輸上知公有才免其處分旋命攝甘肅布政使辦理軍需時王師征準噶爾故事兵四名

所過處供肴烝一席健兒呼呶州縣苦之公奏官兵原有口糧按站支給請飭州縣改所供爲牛羊乾脯俾兵且食且走免稽行程上可其奏臯蘭令奉將軍嚴檄限五日內解送穀袋三千令錯愕無措公命各典鋪將質押民間糧食袋借出記數責成押運官運畢歸還不三日而事辦當是時甘肅路遠自涇州起至甘肅共二十餘站尖宿五十餘處一路塵市甯謐兵無驛騷二十年補授福建按察使閩故多盜南洲積賊范某渠魁也有拳勇歷任不能擒公訪知賊頗孝乃拘其母以招之范果出請死公許自新命縛羣盜以贖范涕泣叩頭去終公之任不再犯法公又多置哨船增營兵按月輪巡全部肅然每訊囚反覆詳審不得其情不止有邱廷華者姦同舍生致死事屬暗昧誣引他人前臬使獄已具矣公鉤距得實力爭於大府前訊釋無辜而置廷華於法在閩六年天子擢公廣東布政使公感上恩益奮奏首領佐雜雖微員有佐理之任宜加斟酌呈覽不必拘六年俸滿之例奏雲貴川廣路遠大員丁艱宜速奏限驛行四百里免懸缺久待奏國家封典原以教孝也今見請封生母供結內註並非再醮二字殊乖忠厚傷人子之心按結內旣稱某人室女以禮聘娶則非再醮可知何必多此詞累疏入上皆嘉許飭部頒行瓊州舉人某請咨入都吏嫌用印處殘損駁回州文公念瓊州隔海往返甚難命補藩印給發吏爭無此例公不聽次日出行此人持香跪謝方知擾破州文者即吏所爲作脅索張本公之精神淵箸細事不遺皆此類也丁文靖公憂服闋入都聖眷益隆驟遷兵部右侍郎晝日三接行將大用同官忌之以蜚語搆公天子休公於家與三品銜回籍讀書公遵旨掩扉足不入城家有賜書數萬卷朝夕自課葺文靖公故園蒔花栽竹嘯詠其間雖高年猶臨帖作楷神似晉人家居

後疊次祝 釐迎 駕 上必召見 溫諭寵錫復二品原銜五十年與千叟宴賡歌賦詩

恩賜稠疊士論榮之辛亥仲秋公慶八十生辰仲冬四日無疾遽終子八人女四人第六子培輿余壻也猶記壬寅歲到公家住紅泉書屋每晚公必命童子提燈而出絮語生平決某獄辦某案漏下四鼓猶娓娓不休其卓然可傳者無慮數十事惜予年衰善忘不及筆記而今又十年矣諸公子丐余銘墓不能如當年撰吾師神道碑之詳嗚呼余其負公也夫以某年某月某日葬某

銘曰槃槃史公炯介明淑端右之才旄車之族真想在衿精神滿腹既勤施於四方亦遂心於初服爾壽爾康無適無莫爛其盈庭森蘭挺玉欺魄無傷神霄有錄以一個臣享九五福偶然逝矣如客不速又何必絮語諄諄而啟予之手啟予之足

永昌府龍陵同知金公墓志銘

吾師金中丞震方先生有從孫曰岳字哲訓生而英異十四歲聞其父觀察公誦于清端公文集慨然慕之及長善射好談兵凡握奇風角奪槩跳刀之法靡不殫究始筮仕平樂府通判歷署麥嶺梧州同知荔浦靈川來賓等縣皆邊地也最後署羅城縣羅城者于清端故所宰邑瘴癘毒淫人皆憂之君獨喜曰余仰止清端數十年今竟蒞公所治或者公其有以默相之乎到卽創建公祠輯公所著政書爲之傳播居羅城一年前後獲盜百餘里無夜警調補桂林龍勝通判龍勝水土尤惡抵境不及三月妻妾家人死者纍纍君亦殫殫幾死者數矣然伏櫪之志雖病不衰每獨策一騎周歷叢篁深箐搜訪其山川阨塞宵小竄匿之所著爲桑江平樂紀要二書某宜屯兵某宜置戍科別其條若指諸掌適制府蘇公巡邊見其書

稱奇才奇才卽欲荐君君以疾辭退而語人曰蘇公不能馭下慮他日有事未幾蘇竟以罪
免巡撫熊公聞之歎曰金別駕知幾其神乎君浮沉粵西最久復移官於蜀於滇所歷皆瘠
苦磽确之地其戾屯勞悴若從骨相中帶來雖力疾自強遇險益奮而馳驅烟瘴垂三十年
君亦皤然老矣君短視秀羸多能恢奇自喜所至重文學興教化故人子及先賢苗裔有貧
不能自存者傾囊賙之必盡其駐龍陵也永昌諸生越數百里裹糧從之遊又共述君實惠
紀畧文行節錄傳於世終以龍陵同知乞病就養於長子見龍八閩署中年六十三而卒嗟
乎君有志慕清端公其動心忍性相似其才亦未必不相及也然當日清端公宰瘴地死者
七人耳不及五年總督江南君宰瘴地死者至十三人之多乃卒以同知終老豈天之將降
大任或然或不然耶抑必欲放清端公獨占千秋而不容後人追相存偶耶余受君叔祖中
丞公知因得與尊人觀察公遊後中丞薨余爲撰碑觀察公死余爲銘墓今君亡又因君子
見龍之請而爲銘君之墓然則昌黎哭殿中馬少監三世悲哀不勝轉怪世之欲久不死而
觀居此世者何耶不知有昌黎之文而少監至今死猶不死則又未嘗非久居人世者之爲
也嗚呼銘人三代古人希有余竟公然爲之則其老且衰又甯堪問哉君若有知其悲我當
更勝於我之悲君也已君子二人妻某氏以某月某日葬某
銘曰本性根土人性根祖道素之門自兼文武嗟哉金君心追古賢何地不可官而與瘴爲
緣能使百姓活而妻孥轉歿三宿隨園一朝決捨握筆銘君老淚傾瀉雖久屈於人間終常
伸於地下

淮徐營遊擊加贈文林郎田公墓志銘

余屢遊蘇州聞人道長洲令田涵齋之孝與其封公香泉先生之賢問狀何若曰涵齋善養父志知老人愛山水時奉一騎一板輿恣其嬉遊以吳人之浮薄而封公排日出署竟齊其口無一人造作蜚語者非其道韻平淡有以深孚於人心何能如斯余聞而敬焉丁未冬遇涵齋於酒所愛其伉爽每兩人語輒移時今年刺海州丁封公憂書來乞余銘墓狀曰公諱玉字存璞號香泉世籍瀋陽祖黼色公始遷大興少時豪健善騎射務爲名高一日在郊外遇潘長者教之讀書曰好勇不好學將流爲逋蕩矣公歸讀大學集註至去其舊染之污六字憬然有悟遂折節改行爲滿洲完顏公所知公督南河挈公相助完顏公薨相國高文定公尹文端公尙書顧公琮相繼作河帥皆器重公以碭山把總驟遷高堰河營守備歷遷至淮揚淮徐遊擊嗚呼完顏公者名偉余座主留松喬先生之季弟也明允篤誠造次必於儒者壬戌歲余改官江南蒙以通家子弟見待留宿署中慰誨殷勤其他若高尹顧三公皆海內正人而亦余所親炙休光者昔人云窮視其所與達視其所舉以四君子之舉公公之爲人從可知矣公生有至性在袁浦官署忽趙趙然心驚急歸視母母果病視湯藥半月竟得送終年過懸車堅求解組歸常端坐手一編凝塵滿席澹如也所著有省吾錄附蓬小草等集卒年八十有七元配趙氏繼劉氏子文龍孫慶豐三代皆贈如公官以子貴加贈文林郎以某年某月某日葬某

銘曰逖矣田公誰與伍漢之朱雲晉周處游俠趙趙力如虎一朝納約循規矩盾頭磨墨兼文武興來詩筆如牛弩三品尊官棄如土來看子舍綵衣舞終其天年歸紫府高風不愧古

誥封光祿大夫奉宸苑卿布政使江公墓志銘

乾隆己未冬余恩假歸娶路過揚州初識江公穎長余年二十有四而公始任戴冠其時兩淮司馬莢者侈侈隆富多聲色狗馬投煢格五是好而公獨少年淵雅與王己山程午橋諸先生遊山賦詩余灑然異之亡何齟齬寢削商中耆舊凋謝恭遇國家大典禮大猺役大府無可咨詢惟公是賴公閱歷既久神解獨超輔志弊謀動中款要每發一言定一計羣商張目拱手畫諾而已四十年來凡供張南巡者六祝太后萬壽者三迎駕山左天津者一而再最後赴千叟宴公年已六十餘每跪道旁上望見輒喜召前慰勞詢問家常所賜上方珍玩加級紀錄之恩莫可紀算轉運使出都請訓上面諭江廣達人老成可與咨商廣達者公行鹽旗號也公自念一商人並非勳舊閱閱而帝心簡重如此受寵若驚惴惴如畏亦不自知其所以然丁丑辦治淨香園稱旨賞給奉宸苑卿銜壬午盤獲內監逸犯有功晉秩布政使銜辛卯上知公貧賞借帑三十萬以資營運一時羣商之趨下風受指麾者或相噎媚退有微詞公絕不與較未幾兩淮提引案發上震怒不測羣商就逮京師勢洶洶度不能自脫而公慨然一以身當廷訊時唯叩頭引罪絕無牽引上素愛公又嘉其臨危不亂有長者風特與赦免其他鹽政諸大吏咸伏歐刀而公與羣商拜恩而返妻孥迎門先眇後笑方知大樹之下可借餘陰無怪其干霄而捧日焉先是揚州城南有高阜相傳前明康海讀書處公家其旁葺而新之疊石穿池請駕臨幸上喜平山之外得近處小憩兩幸其園賦詩以賜公抱七歲兒迎駕上抱置膝上摩其頂親解紫荷囊賜之恩幸之隆古未有也公長身蘊立角犀豐盈晚年雖鬚白如銀而神采煥發聰強不

衰性尤好客招集名流酒賦琴歌不申且不止邗江地當衝要公卿士大夫下至百工伎藝得珍怪之物及法書名畫無不從從然屢及公門如龍魚之趨大壑公一與申納周旋必副其意使去以故賓從藉公起家者無慮數十輩而公轉屢空身歿之日家無餘財人以比古之樊靡卿陳孟公一流而風雅過之公諱春字穎長生時白鶴翔於庭因別字鶴亭本籍徽州歙縣祖演徙居揚州父承瑜皆以公貴贈封如公官生 子 女皆不育繼弟昉之子振先爲後又天公歿之前一日再繼其弟振鴻壬寅春余持公詩遊黃海一邱一壑如得導師歸告公公曰我將遊天台亦持君詩作證兩人盡以名山作交易耶嗚呼息壤在彼而公有志未行竟從此訣其可哀也已公卒時年六十九以某年某月某日葬某銘曰四民之末三揖以前問厥由來奇賞自天奕奕江公宏智辨達手握牢盆葬枯粟乏善與人交靡不有終赴義若熱艾物必豐均輸 國計軍餉河防惠我黎烝盲禿僂厖遭逢虞巡靈臺營造工垂神明馬鈞機巧 天子曰咨汝實卿才奉朕宸遊源源而來公承 寵命千里駿奔遨遊 宮苑歸夸戚隣一箇匹夫三公不換鼻息所衝上拂雲漢年高委化人琴千秋歌吹已寂聲華未休松耶柏耶志幽者石耶我爲之銘石敢泐耶

太子太師文淵閣大學士錫山嵇文恭公墓志銘

乾隆五十九年七月十七日文淵閣大學士嵇公薨於位 天子駕幸熱河聞信震悼加贈太子太師 賜諡文恭命 皇八子靈前奠酒 遣官護喪歸里飾終之典海內榮之次年九月其子承豫等卜葬有期馳書爲貞石之請枚伏念文恭公碩德重望年登大耋名聞四夷古大臣中惟召康公文潞國差堪比肩枚才盡年衰何能當茲重任然追思弱冠試鴻博

報罷落魄長安蒙公聘教公子得朝夕沾接風采受公知最早而因此知公亦深誼不當以不文辭謹按公諱璜號尙左字黼庭晚又自號拙修系出晉侍中紹之後家居金陵祖永德遷無錫以諸生在福建總督范忠貞公幕中同殉逆藩耿精忠之難聖祖追贈國子監助教陪祀范公祠父文敏公諱曾筠以康熙丙戌翰林歷任江南總河浙江總督拜文華殿大學士公其第三子也生而嚴重寡言笑雖貴公子而動容周旋造次必於儒者九歲讀禹貢恍然曰禹之治水皆自下而上蓋下流宣通則上水自順流而下長老咸驚異之識者曰此子他日必爲名臣能宣汾洺而障大澤者也雍正七年春奉世宗特恩大臣子弟一體會試公年纔二十以太學生登進士入詞林給假歸娶散館授編修命南書房行走尋遷左春坊左諭德乾隆元年今皇上登極文敏公總督兩浙三年秋有旨召入閣辦事文敏公病奏請解任公驚駭乞假省親倍道奔馳爲馬傷血浹袷到署未浹月文敏公薨當時文敏公年高病久一切公私事叢雜如麻中外頗有譟語非公到不能料簡帖然也六年服闋入都奏請停各省采買極言其病國病民病官諸弊又奏河東總河一缺宜專其職守凡有題補修築等事不必會同兩省巡撫致有掣肘推諉之弊天子可其奏七年遷學士再遷僉都御史副都御史工戶兩部侍郎充經筵講官十八年扈駕木蘭甫進哨而江南黃水爲災高堰圯於風浪奉命勘驗督修功成議敘二十二年命爲江南副總河公奏淮揚運河自邵伯以北者皆歸海邵伯以南者皆歸江多一分入江之路卽少一分歸海之水歸海路近歸江路遠宜開挑引河正對閘河改曲爲直趨海爲便又奏湖河源流分合設壩放淤諸務尤詳奉 上諭所奏甚合機宜下河一帶經理汝功不小也二十三年遷工

部尙書調禮部尙書入都仍侍值 南書房二十四年公母何太夫人有疾公陳情乞養
上許之先授總河時太夫人年已八十有三公早有此請 上諭汝父久任河工汝趨庭時
見聞甚悉長淮一衣帶水儘可迎養不必在家侍奉也公不得已而赴任至是得請才能領
天倫之樂陶陶遂遂侍寢問安自言此千金一刻時也孝養五載而太夫人薨三十一年服
闋還都實授禮部尙書旋授河東總督兼兵部尙書公起任之便卽繞道河南相度河形蒞
任後裁壩夫栽堤柳革除墊崖貼坡諸弊偶巡河至商邱五堡命幫裏戢十丈衆不喻其意
俄而節過白露河官皆慶安瀾酬神張飲公尙欲詣工親勘衆以公積勞咯血勸勿往公不
聽行至半途而探馬飛報大隄湮塌八丈幸有新幫裏戢可資保護衆始嘆服公之深識遠
慮也然亦有神助出於意外者公每巡河輒先屬吏冒風雨或手持畚鍤以行一日宿廟中
聞虞城工險馳往其時天甫曉雨雹交下趨視所下之埽岌岌欲崩從者瑟縮面皆改色或
遮勸勿前公立堤上厲聲叱曰埽去則我與俱去聲息雨雹亦息堤卒無恙又因防險宿河
堤行館夜聞訇磕聲撼臥榻皆動起視無他黎明報對岸河塌數十丈公所宿堤下忽漲起
沙灘如其塌數人以爲神又勘驗曹縣三保河河溜漸逼羣議下埽而未定某所公夜夢金
甲神持劍指溜處曰吾張桓侯也速下埽吾與趙順平助汝驚起周視形勢如所指處下之
竟得安瀾因於月堤建桓侯廟而并建順平侯廟於對岸論者僉謂 聖朝福大百靈効順
而要非公之精誠不能感格也四十四年以吏部尙書兼翰林院掌院學士充日講起居注
官四十五年授文淵閣大學士教習庶常 賞海淀官園居住四十六年加太子太保在
尙書房總師父處行走公歷事 兩朝垂七十年兩爲山陝正主考一爲乙未會試總裁其

他殿試讀卷朝考閱卷以至總裁三通四庫國史實錄諸館者不可枚舉 上亦視公如商
彝夏鼎雖不必服用而陳之廟堂醇樸典重邦家有光故五十年行千叟宴 命爲漢大臣
領班五十五年庚戌會試喜公重赴瓊林 賜詩矜寵公又與 上同庚八十生辰本在六
月公道臣不敢先君擬改期於 萬壽後 上嘉其知禮代定八月十九日 遣侍衛明安
爲之稱觴 賜詩及上方珍玩金幣無算公慮盛滿難居屢疏乞歸至於再至於三 上念
老成凋謝不忍公歸又憐其年力就衰 詔嵇璜高年入直如遇風雪不妨遲至卽不入直
亦可先 賜紫禁城騎馬再 賜肩輿到殿公銜感次骨泣且嘆曰君父體恤老臣至於如
此死有餘榮自後不敢復作思歸之想然素性恭謹非體有不適與極大風雪仍步行入
朝如故也公議事畫稿無鉅細必沉思審定求一是處雖位極人臣而依然儒素猶記戊午
年枚館公家每 朝罷歸相與談史鑑數千年事如指掌自言在南書房汪文端梁文莊諸
公各言所長推公見解爲第一公亦夸枚云先生非特文佳人亦好也其受知如此公精小
楷能於胡麻上作書所作詩多不存稿惟奏疏數十篇藏於家娶楊氏誥封一品夫人子八
人長承謙受業於枚最純靜官至翰林院侍講先公亡次子承豫雲南劍州知州因公褫職
上加恩以主事用次承閑承羣承樸承恂承良承廉女一人嫁袁氏孫十二人曾孫三人
享年八十有四葬嶧嶂山之新阡

銘曰錫山峯高惠泉水清降生嵇公明允篤誠少如威鳳來儀虞廷壯司水政元圭告成官
久能貧廳堪旋馬貴而不驕懌然意下有所薦引不圖報謝惡隱善揚矜孤悼寡每逢 召
對讜論直陳退而愼密溫樹不言傾衿禮士正色立 朝人之仰之孤月行霄豈不戀闕臣

力已竭 天子留公纏綿悱惻給扶挾侍曠典重重自天而降觀者動容 恩重身輕歸心難遂從古臯變不聞引退巍巍華表鬱鬱松楸銘公者誰我亦千秋

蘇州府知府楊公墓志銘

余嘗書楊君鏡村測囚事爲作吏者法已十餘稔矣今冬其子書來乞余銘墓當楊君存時余尙恐沒其善行故書而志之今楊君亡可不彰其所聞慰孝子之心哉謹按君諱燦字鏡村號質亭福建邵武府人幼即入學食餼以乾隆丙子舉人發江南權知上元縣實授寶應調長洲遷知高郵州再遷常州府知府調蘇州因公鐫級補海門同知年六十卒君秀挺機警長不滿六尺而精悍之色溢於眉宇所蒞處除苛解嬈侃侃事上溫溫接下吏民帖然長洲案牘麻起兼開白茅河君判決如流疏濬得法高郵大旱布政使閔公不肯報災君爭之閔曰汝擢守常州將行矣何必強預人事君曰官之於民父也安有父將遠行而忘其子之飢寒乎閔不能奪卒如所請乾隆五十年海門災君請招商領照赴運漕採米屯戶聞之盡行出糶價以大平總督高公出巡上元有禹郭氏者訴次子尊玉淫其妹已有身矣高公大駭命君鞠訊君覺情狀非是乃陰召其小女瞰以果餌得其情案遂以定其隣人聚而歎曰天乎前三年禹郭氏與姦夫解五誣其長子積玉逼嫁阿嬭官不細詢已斬決矣今解五欲占禹氏家產故又唆其母妹謀殺尊玉微楊公則一門奇冤又誰雪哉蘇州顧周氏咎婢婢縊死前官疑周氏與其奴吳祥有姦故殺以滅口已刑逼誣伏矣君曰周道如砥其直如矢治獄不可以意爲也周氏咎婢致死自有本罪若以暗昧事陷人於十惡非法也即省釋之撫軍楊公魁謂余曰子屢稱楊守之賢我猶未信今春張欒盜于闐玉事發 聖旨嚴切我

震悚不知所爲一時獄繫纍纍賴楊守部居別白專誅讎而寬其誤買玉者奏上果蒙 俞
允歡聲如雷我方信楊守之賢而嘆子之能知人余笑曰是奚足哉公知楊守終未盡也撫
軍驚問余曰買玉人杜開周常向余言玉案事平渠感楊守超雪恩邀諸賈人輦金幣爲謝
昏夜致之楊絲毫不受此公所不知楊所不言而余所獨知者也撫軍爲嘆息者再君之降
調也爲辦常州府弓兵一案 天子怒其擬罪失入特予降調永停陞遷不知刑部所擬即
君之初詳也撫軍閱公三詳三駁君不得已遷就從之及遭嚴譴勢不能再揭部科又不能
遣諸胸中遂隱忍紆鬱妄笑語昏亂竟成狂易之疾以至於死嗚呼其可哀也已夫人某氏
子學基候選布政司理問孫二人以某年某月某日葬某
銘曰鏡能照物無隱隱兮君取自號其儀一兮施於爲政上下悅兮蒼蒼者天斯人也而有
斯疾兮固知壽爲欺魄夭爲鳧沒古有說兮然而未竟所施民思何極兮吾不能臨其穴但
能志其石吁嗟楊君安此室兮

蕪湖兵備道張公墓志銘

公張姓諱士範字仲模號芷亭先世爲山西洪洞縣人遷居陝西蒲城祖國祚父克光俱以
公貴誥贈中憲大夫世有積德卹饑拯災戚里受其惠者咸交口祝延之遂生公幼即穎異
舉止異凡兒每塾師出對句或分韻題詩公應聲如響聞者蟻伏丙子舉於鄉庚辰補內閣
中書甲申援例選福建興化府知府旋丁母憂歸服闋選浙江衢州府知府因公左遷捐復
原官選安徽池州府知府久之 特授安徽蕪湖巡道又因公左遷公離家久將歸省墓途
間患疴就醫白下遂至不起年六十四公被飾厥躬慕君子之安雅善氣迎人行安而節和

見者皆慄然意下四權臬使兩膺卓薦 天子召見輒加 溫獎奏對移時池州民多凋敝
官俸淡薄蕪湖轄五府一州兼權關稅俗尙華離人俱爲公憂公夷然不以爲意抵任後問
民疾苦察庫盈虛廉不言貧勤不知憊不矯虔以弋名不舒緩以廢事卒使吏靜民安商賈
鬻至課以報最貴池縣西有火燒蕩公嫌不祥建天一亭取以水制火之義未幾融風頓息
己酉皖江水暴漲魯港有麻浦圩幾淹矣公親往堵塞露立三晝夜堤竟保全丙午旱蝗公
自爲文禱於神山李衛公祠甫下山而雨蝗亦蔽天飛去公於治獄測囚尤詳審權臬使時
鳳陽孀婦迨管氏刈麥於田姑老矣墜樓身殞長子鳴九素忿婦謀吞其產以婦推姑墮控
縣縣令不察擬婦極刑公詰之曰姑死旁無見證身無他傷何由知是管氏所推耶鳴九不
能聲婦冤始雪鳳陽人嗜曰微張公吾鄉其六月飛霜乎公道韻平淡於人世紛華投瑩博
弈歌舞諸事絕無所嗜平晝閒居惟手一編吟詠不輟或取古人法書臨摹自喜愛才出於
天性遇寒素必傾衿禮下之所屬書院有廢必興厚其餐錢嚴其課人文蔚起丙戌秋與余
初遇於高制府署中一見如舊相識三十年來酒賦琴歌時時需接今秋病中氣息綿惓猶
強起絮語約小差後過從爲懽不圖余往京江未半月歸而公訃已橫几上嗚呼浮生局促
天意渺茫原不許人控揣然余犬馬之齒猶禮先一飯矣分當先填溝壑乃一日郎君反以
墓銘見託其能無悲從中來筆未揮而淚先下哉古語云善人云亡百身莫贖如公者當亦
海內士林所異音同嘆者夫所著有澹園詩鈔所臨有十七帖絕交書三種先娶雷氏再娶
王氏俱誥封恭人子汝驥壬子科舉人試用教諭次汝驥廩貢生出繼 弟夢選三子阿玉
尙幼女七人俱適士族孫 人以某年某月某日葬某

銘曰旃檀一樹百里外聞其香也福德一星九州內瞻其光也肫肫張公國之良也身雖逝兮民不能忘也壽固未爲短兮餘慶知更長也鬱鬱佳城此其藏也猶有鬼神俾爾子爾孫隆隆其未央也

江防同知倪君帝培墓志銘

君倪姓名廷模字帝培別字春巖爲山陰倪文貞公之後遷居杭州昆仲五人君其季也生而聰敏嶷嶷不凡髫年入泮己卯舉人庚辰進士補安徽潛山令調桐城遷宿州牧因公落職起復補直隸保安州牧又因公落職起復補皖江懷甯令權知六安州又因公降調補夥縣令再署桐城膺卓薦實授江防同知署潁州太守滁州牧委審湖北黃梅事路染疾歸遂不起年六十有四君少時美秀性通脫不受拘閼嘗學小冠杜子夏搖蕉扇簪花游治方領矩步者動相訾訾君夷然不以爲意及作吏精廉強力桴鼓不鳴人驚以爲不可測嘗言理民如理髮也亂髮不除好髮難整孔明爲政路無醉人故其治一以嚴爲主潛山武舉萬年青虎而冠者也君到一大創之地以甯謐桐城災一時無賴者藉荒爲名糾衆劫奪君知天甯莊梅能哲爲首擒其父子當街杖殺之羣黨解散所到處利必興弊必除潛邑無城君曰城以衛民無城則奸宄出入自如且地形若釜雨久外水灌人民游釜底矣請於大府領帑興工烈日中親執撲以行築者功城而水患除滁州向例銀鞘過境地保糾錢助費君不可曰滁鞘來往不絕地保斂民民何以堪卽發官錢馱送下站餘差盡革宿州辦公蠹役強拉民車與錢則免君乃通計各鄉車數若干編列字號挨次輪直出示曉民當直者自行赴官承應民踊躍稱便君尤長於治獄桐城義津橋有盜案四參將屆君比捕嚴捕役章標賄賊

某冒充君疑之畧究詰知其寃登時縱之胥吏皆失色幕友尤君君曰吾甯受處分不忍以民命爲兒戲亡何他案羣盜互相投首而此案遂明英山僧廣明姦杜某兒婦值杜撞見遂擊殺之而反誣其兒逆倫縣令不察獄已具矣君爲平反合郡懽呼君槃槃有才而宦塗乖午英山一獄天子嘉其能得正兇特旨召見正在請咨而忽奉部文降調最後受知於孫

補山相公許薦知府薦草成而補山入閣旋爲有力者所奪屢起屢躓嶽奇歷落如其爲人若暗中有齟齬之者君雖作達如故而中懷鬱紆年力亦從此衰矣君赤貧初試春官賣屋以行而慷慨好施揮金帛如棄涕唾肩任前官虧項兼助其歸不一而足桐城饑捐俸倡振所活數萬人其他歌場酒所亂擲纏頭亦復豪宕自喜以故歷官數十年家徒壁立幸而所莅之地臨去時民皆具腴脯捆載以從常入都留眷奉太夫人僑寓宿州家無旨畜私心憂之比其返也跪膝下問安太夫人扶起笑曰兒去後不料此間童叟供給較兒菽水之奉尤覺豐盈此皆兒平日作好官之效也兒他日其始終如一哉乾隆二十九年聖主南巡尹文端公辦攝山供張委君與商人汪楷亭曹學賓委員魏廷會莊經畚朱龍鑑等董率其事山光水色中輪流置酒招余留宿說鬼評羹漏盡不休嗚呼纔三十年前事耳今文端公久葬諸賢零落殆盡幸存者惟余及君君又溘然先去而余年亦七十有九然則歐陽修所謂賢豪不常聚而交游之盛爲難再其信然耶恐山靈有知亦當泣下君善談笑能詩隨園詩話中所采甚多著四蟲備覽一書尙未付梓妻魏氏再娶余氏無子繼兄子本仁爲嗣舉丁酉孝廉孫三人以某年某月某日葬某銘曰漢有朱邑葬於桐鄉君能繼之兩臨茲邦善政流風迢迢相望異世通夢盍祀其旁胡